

NAJZNAČAJNIJE AKTIVNOSTI U 2018/19. GODINI

Let's do it za Tuzlu

U petak, 14. 9. 2018. godine, učenici Medrese su učestvovali u ekološkoj akciji Let's do it. Ovo je sedma ekološka akcija, a ove godine učesnici su čistili ilegalne deponije. U ovoj aktivnosti učestvovali su i učenici Medrese, koji pohađaju ekološko-botaničku sekciju i Acces program. Ova aktivnost se održava u više od 100 zemalja svijeta i to u sklopu velikog projekta Let's do it - očistimo planetu zemlju za jedan dan. Učenici su čistili ilegalne deponije lokaliteta Ilinčica zajedno sa svojim vršnjacima iz drugih srednjih škola.

Učenici Medrese posjetili Potočare

Povodom obilježavanja 15. godišnjice otvaranja Memorijalnog centra Srebrenica - Potočari na skroman način, polaganjem cvijeća i učenjem Fatihe obilježen je i ovaj datum. Ovoj godišnjici su prisusvovali i učenici Medrese. Nakon programa posjećen je i Muzej genocida, kao i novootvoreni savremeno opremljen muzej u bivšem Glavnom štabu holandskog bataljona UNPROFOR-a, u jednoj od bivših proizvodnih hala. Učenici su mogli vidjeti život Srebrenice u slikama, prije nego li je postala zaštićena zona, kao i

poslije, mnogobrojne fotografije, dokumente, videozapise iz ratnog perioda. Ovaj muzej pruža vjerodostojnu sliku života i stradanja Bošnjaka ovog kraja u periodu Agresije na našu domovinu. Memorijalni centar u Potočarima otvoren je 20. septembra 2003. godine. Otvorio ga je bivši predsjednik SAD-a Bill Clinton. Do danas je u Memorijalnom centru ukopano 6.610 žrtava genocida.

Omer Muminović proglašen najboljim liderom

U ponedjeljak, 24. septembra 2018. godine, učenik Behram-begove medrese Omer Muminović primio je nagradu kao najuspješniji član sekcije Liderstvo i poduzetništvo. Nagradu je omogućila fondacija Forerunner Federation iz SAD-a, koju predvodi prof. Andrew Balas. Omer je bio inicijator raznih projekata na sekciji, a nagradu mu je uručila prof. Amila Hasanbašić, koja je ujedno i koordinatorica projekta između Forerunner Federation i Behram-begove medrese.

Finalisti YES programa

Učenici prvog i drugog razreda Behram-begove medrese u Tuzli, Mešić Azra, Merić Amina, Dorić Lejla, Ibrahimkadić Ilhan i Mujezinović Velid plasirali su se u finalni krug testiranja za prestižnu stipendiju Vlade Sjedinjenih Američkih Država u okviru YES (Youth Exchange and Study) programa. Ovaj program razmjene omogućava učenicima iz Bosne i Hercegovine da provedu jednu školsku godinu u Americi, da pohađaju neku od američkih srednjih škola, te budu svojevrсни mladi ambasadori svoje domovine, kulture i vjere tokom svog boravka i pohađanja škole u Sjedinjenim Američkim Državama. Ovo je veliki uspjeh za učenike, ali i za našu školu, jer se u finalni krug testiranja plasiralo 20 učenika s područja Bosne i Hercegovine, uključujući i Brčko distrikt. Navedeni učenici su i polaznici Access programa učenja engleskog jezika, koji se u Behram-begovoj medresi u Tuzli uspješno organizira u saradnji s Ambasdom SAD u Bosni i Hercegovini.

Održan seminar za debatante

U Behram-begovoj medresi je 1. i 2. oktobra 2018. godine održan seminar za debatante i audicija za nove članove sekcije. Seminaru

je prisustvovalo 18 debatanata. Nakon predavanja o vještinama govorničtva i Karl Popper formatu, učenici su dobili priliku i da sami debatuju. Teme ovog malog turnira su bile iz tematike aktuelnih društveno-političkih zbivanja. Također je donesena i odluka o datumu održavanja školskog takmičenja iz debate i napravljen je plan tradicionalnih javnih debata, koje se održavaju svakih 15 dana u amfiteatru Medrese. Učesnicima seminara pedagog Behram-begove medrese Fuad Imširović dodijelio je zahvalnice za učešće.

Tri dana volonterizma

U periodu od 29. septembra do 2. oktobra 2018. godine održana je četvrta volonterska akcija mladih pod nazivom „72 sata bez kompromisa“ u Bosni i Hercegovini. U ovoj akciji su učestvovali učenici Katoličkog školskog centra i učenici Behram-begove medrese u Tuzli. U periodu dok je trajala akcija volonteri su posjećivali domove za djecu bez roditeljskog staranja, domove za djecu s poteškoćama u razvoju, staračke domove, dječije vrtiće i trgovine. Volontiranje u trgovinama podrazumijevalo je podjelu infomaterijala o programu, te listu stvari za kupovinu, zatim spisak najkorisnijih namirnica za pripremu jela u javnoj kuhinji “Merhamet”. Prolaznici koji bi kupili neki od navedenih artikala ubacili bi proizvode u kolica na izlazu iz trgovine.

Dan Behram-begove medrese

Svečanim programom u utorak, 9.10. 2018. godine, obilježen je 6.oktobar, Dan Behram-begove medrese u Tuzli. Svečani program su izveli učenici i učenice naše škole, a proglašena su odjeljenja koja su u prošloj školskoj godini ostvarila najbolji uspjeh, kao i učenici koji su bili najbolji u svojim odjeljenjima. Priznanja su ove godine primili profesori dr. Mensur Husić i Samir Spahić, te Hajrudin Dedić, domar u našoj školi. Direktor Behram-begove medrese Ahmed-ef. Hatunić uputio je čestitku svim učenicima i profesorima za ostvarene rezultate u prošloj godini, a posebne čestitke je uputio ovogodišnjim dobitnicima priznanja. Istakao je da se samo radom i zalaganjem mogu postići rezultati, a da se trud i rad isplate.

Obilježen Dan vakifa Behram-begove medrese

U subotu, 20. oktobra 2018. godine, obilježen je Dan vakifa Behram-begove medrese. Ovo je tradicionalna manifestacija koja se održava dugi niz godina, a svake godine novi vakifi dobiju vakufname, kao potvrdu dobrog djela koje su učinili. Direktor Behram-begove medrese Ahmed-ef. Hatunić je istakao kako su na putu kojim Behram-begova medresa ide već skoro četiri stoljeća mnogi utkali svoje ideje, snagu, misli i imetke, a među njima su i vakifi, koji su posebno u periodu obnovljenog rada Medrese pomagali ovu školu i bili dio svakog njenog projekta. Mnogobrojnim vakifima i prijateljima Medrese obratio se i muftija tuzlanski Vahid-ef. Fazlović. Nakon svečanog programa, koji su pripremili učenici i učenice Medrese, dodijeljene su vakufname novim vakifima, a mnogi od njih su zaposlenici Behram-begove medrese.

Susret sa zlatnim sportistima Behram-begove medrese

U petak, 19. 10. 2018. godine, direktor Behram-begove medrese Ahmed-ef. Hatunić susreo se sa zlatnim sportistima Behram-begove medrese. Oni su u protekloj školskoj godini postigli izuzetne rezultate, kako u pojedinačnim disciplinama tako i u timskim sportovima. Također, oni su postigli i veliki uspjeh, osvojivši 20. sportske susrete srednjoškolskih obrazovnih ustanova IZ-e u Mostaru. Sa sportistima je bio i Samir Spahić, profesor tjelesnog i zdravstvenog odgoja u Medresi, koji je predvodio sportiste u svim njihovim uspjesima. Direktor Hatunić im je izrazio svoju veliku zahvalnost, jer su svojim vrhunskim rezultatima pronijeli slavu naše škole širom naše domovine.

Susret mladih matematičara i fizičara u Tuzli: uskoro kamp prirodnih nauka

U petak i subotu, 19. i 20. oktobra 2018. godine, u Behram-begovoj medresi održani su Prvi susreti mladih matematičara i fizičara medresa i gimnazija Islamske zajednice u Bosni i Hercegovini. Susretu su prisustvovali učenici iz Prve bošnjačke gimnazije iz Sarajeva, Gazi Husrev-begove medrese iz Sarajeva, Medrese „Osman-ef. Redžović“ iz Visokog, Elči Ibrahim-pašine medrese iz Travnička, Medrese „Džemaludin Čaušević“ iz Cazina i Behram-begove

medrese iz Tuzle. Tokom dva dana, koliko su trajali susreti, predavanja su održali dekan Prirodno-matematičkog fakulteta Univerziteta u Tuzli dr. sc. Vedad Pašić i profesori ovog Fakulteta dr. sc. Smajo Sulejmanović, dr. sc. Suad Kunosić, kao i profesor fizike u Behram-begovoj medresi mr. sc. Dino Ćorović. Tom prilikom su prisutni mogli da vide i nekoliko praktičnih radova i oglada. Tokom susreta vođene su diskusije i o potrebi povećanja fonda časova prirodnih nauka, posebno u trećem i četvrtom razredu medrese, kao i usklađivanju planova i programa nastavnih predmeta matematika i fizika. Planirano je da ovi susreti postanu tradicija i da budu unaprijeđeni u svojevrstne kampove, u cilju afirmacije ovih egzaktnih nauka među učenicima srednjoškolskih obrazovnih ustanova Islamske zajednice u BiH.

Osnovci iz Lukavca i Kalesije u posjeti Medresi

U Behram-begovoj medresi je 25. 10. 2018. godine održan seminar na temu „Mladi lideri“. Učesnici su bili najuspješniji učenici i učenice iz osnovnih škola s područja općina Lukavac i Kalesija. Na početku seminara obratio se Mensur Husić, pomoćnik direktora za nastavu u Behram-begovoj medresi, te tom prilikom istakao važnost sticanja leaderskih vještina, posebno za mlade ljude. Učesnici seminara su bili u prilici pogledati i promotivni film o Behram-begovoj medresi, te se na taj način, uz obilazak kompleksa Medrese, upoznati s radom, organizacijom i infrastrukturom naše škole. Radni dio seminara s učenicima i učenicama održao je Bekir Šabić, odgajatelj u Behram-begovoj medresi. Seminar će se ubuduće organizirati s nekim drugim osnovcima s područja Tuzlanskog kantona.

Muhizinov bijeg u slobodu 1995. godine

U Behram-begovoj medresi je 25. 10. 2018. godine boravio g. Muhizin Omerović, jedan od preživjelih koji se u julu 1995. godine uputio ka slobodnoj teritoriji. Predavanje na temu Šezdeset i dva dana od Srebrenice do slobode je autentično kazivanje o nekoliko susreta sa smrću. Učenicima i učenicama Medrese je uspio na zanimljiv i dinamičan način, s primjesama humora, dočarati svoj bijeg u slobodu od Srebrenice preko bosanskih brda u periodu od 11. jula 1995. godine do septembra iste godine, kada je nakon dva mjeseca konačno stigao na slobodnu teritoriju, koju je držala Armija

Republike Bosne i Hercegovine. Poručio je da mržnja nije rješenje i da treba žaliti sve one koji su učestvovali u genocidu. Zahvaljujući poznavanju nekoliko stranih jezika ostvario je mnoga prijateljstva širom svijeta. Poručio je da treba učiti, jer nam je to jedini izlaz, i da poznavajući jezike možemo steći puno prijatelja, jer smo mi mali narod i trebaju nam prijatelji.

Srednjoškolci obilježili Svjetski dan čistog zraka

U Behram-begovoj medresi je 5. novembra održana tribina povodom Svjetskog dana čistog zraka, koji se obilježava 3. novembra. Tribinu su organizovali članovi Ekološko-botaničke sekcije naše škole. Učestvovala su sljedeće škole: Opća gimnazija Katolički školski centar „Sveti Franjo“ Tuzla, Gimnazija „Ismet Mujezinović“ i Medicinska škola. Tribina je obuhvatila nekoliko bitnih tema o ekologiji zraka, prezentaciju rezultata ankete o čistoći zraka u Tuzli i jednu radionicu. Osnovni razlog održavanja ove tribine je ekološka edukacija, promovisanje značaja čistog zraka i okoline, te međusobno druženje mladih. Na ovom skupu moglo se saznati više informacija o kvalitetu zraka u Tuzlanskom kantonu i načinima poboljšanja čistoće zraka koji svakodnevno udišemo.

EMMAUS u posjeti Medresi

Našu školu su u prošloj sedmici posjetili korisnici dnevnog centra MFS-EMMAUS Zvornik. Ovu posjetu su iskoristili da obiđu kompleks Behram-begove medrese i upoznaju se sa historijatom naše škole. Ovo je uzvratna posjeta EMMAUS-a Zvornik našoj školi. Naime, prošle godine volonteri Medrese su posjetili Zvornik i upoznali se s korisnicima dnevnog centra. Na obostrano zadovoljstvo saradnja se nastavlja i ove godine, kao i humanitarne aktivnosti s našim volonterima.

Edukacija učenika prvog razreda

U oktobru su predstavnici stomatološke službe Doma zdravlja iz Tuzle učenicima prvog razreda Medrese održali predavanje o oralnoj higijeni. Bili su to dr. Mirjana Duspara, načelnica ovog odjeljenja, dr. Admir Brkičević, specijalista oralne medicine i parodontologije i Vesna Begić, glavna sestra. Tako je nastavljena uspješna

saradnja ove službe Doma zdravlja i Medrese, koja traje već osam godina. Učenicima prvog razreda su predavanja održali i predstavnici Ministarstva unutrašnjih poslova i Odgojnog centra Tuzlanskog kantona. Tema njihovog predavanja vezana je za upotrebu, zloupotrebu i sigurnost na društvenim mrežama. Učenicima je o tome pričala Amra Kapidžić, inspektorica u odjeljenju za seksualne delikte, maloljetničku delikvenciju i nasilje u porodici Ministarstva unutrašnjih poslova Tuzlanskog kantona i Dejan Brkić, pedagog i psiholog u Odgojnom centru Tuzlanskog kantona. Oni su navodili iskustva iz svoje prakse, objašnjavajući zakonske regulative koje tretiraju pitanje zloupotrebe društvenih mreža.

Obilježen Dan srednjoškolaca u Medresi

Protekle sedmice su učenici i učenice Behram-begove medrese na inicijativu Vijeća učenika obilježili Dan srednjoškolaca, koji se obilježava na međunarodnom nivou. Bila je to prilika da se učenici još jednom prisjete nevino ubijenih srednjoškolaca u Pragu 1941. godine, ali i da obilježe dan srednjoškolskog aktivizma. Predsjednik Vijeća učenika Behram-begove medrese Alija Mevkić obratio se učesnicima, a potom su uslijedila izlaganja i prezentacije. Nakon ovog programa održana je i radionica za članove Vijeća učenika na temu Srednjoškolski aktivizam i vršnjačko nasilje.

Proučen mevlud u Behram-begovoj medresi

U utorak, 20. 11. 2018. godine, u Medresi je proučen tradicionalni Mevlud povodom rođenja poslanika Muhameda, a.s. Povodom odabranog mjeseca prisutnima se obratio direktor Behram-begove medrese Ahmed-ef. Hatunić. On je istakao da je došao mjesec u kojem trebamo razmisliti o svojim djelima, raditi više na sebi i ojačati međusobne veze kako bismo se približili jedni drugima. Nakon obraćanja direktora Medrese, vjernicima se obratio i muftija tuzlanski Vahid-ef. Fazlović. Gosti na ovogodišnjem mevludu bili su učenici Medicinske škole iz Tuzle, Gimnazije „Ismet Mujezinović“ iz Tuzle, Mješovite srednje škole iz Tuzle i Građevinsko-geodetske škole, sa svojim vjeroučiteljima.

Gostovanje dr. Yamana

U četvrtak, 22. novembra 2018. godine, dr. Ahmet Yaman, predsjednik Komisije za fetve Euroazijskog islamskog vijeća i član Visokog vjerskog vijeća Diyaneta (Turska), boravio je u Tuzli. Gost je tom prilikom govorio i na tribini u Behram-begovoj medresi. Tema njegova izlaganja je bila uloga mladih u poslaničkoj misiji. U potpunom amfiteatru učenici Medrese su s pažnjom pratili izlaganje gosta. S njim je bio i Hasan Atli, savjetnik u Ambasadi Republike Turske u Sarajevu. S njima se susreo i direktor Behram-begove medrese Ahmed-ef. Hatunić.

Dvanaest šampiona znanja

U petak, 16. 11. 2018. godine, u Bosanskom kulturnom centru u Tuzli, u organizaciji Ministarstva obrazovanja i nauke i Pedagoškog zavoda Tuzlanskog kantona održana je svečanost promocije najboljih rezultata i najvećih uspjeha osnovaca i srednjoškolaca s područja našeg kantona u prošloj školskoj godini. Dodijeljena su priznanja učenicima koji su osvojili neko od prva tri mjesta na takmičenjima koja su realizirana u kantonalnoj, federalnoj, državnoj i međunarodnoj konkurenciji. Među laureatima priznanje je primilo i 12 učenika Behram-begove medrese, koji su se takmičili iz raznih disciplina: fizike, engleskog jezika, biologije, hemije, bosanskog jezika, geografije i historije. Priznanja su primili Tursunović Ramo, Britvarević Tarik, Fatić Enida, Selimović Dino, Ćosićkić Dino, Hamidović Edina, Aščić Maid, Ćidić Emir, Ejubović Jasmina, Spahić Kerima, Čičkušić Amina i Begunić Lejla. Naš učenik Harun Bečić osvojio je prvo mjesto na literarnom konkursu Pedagoškog zavoda za srednje škole, na temu „Riječi imaju moć“ i pročitao rad pred publikom.

Ekološka sekcija posjetila firmu Ekoživot

Članovi ekološko-botaničke sekcije su 23.11.2018. godine posjetili Privredno društvo *Ekoživot* iz Tuzle. Direktor ove firme Jasmin Osmanović upoznao je članove sekcije sa značajem njihovog rada na polju ekologije i zaštiti životne sredine. Nakon obilaska prostorija firme učenici su obišli i reciklažno dvorište ekosirovina, gdje su stekli uvid u proces sakupljanja i odvajanja ambalažnog otpada. Ova firma je jedna od pionira u ovoj oblasti na našem prostoru,

koja prati cijeli postupak recikliranja ambalažnog otpada, od uvoza pa sve do reciklaže. Njihov moto Za život u boji prirode oslikava u potpunosti ciljeve ove firme.

Mala škola ekologije

Udruženje građana "Multi" iz Tuzle 15. novembra tekuće godine održalo je radionicu u Behram-begovoj medresi u sklopu programa Mala škola ekologije. Tema održane radionice bila je Stanje životne sredine u Bosni i Hercegovini i svijetu, koju su održali volonteri Udruženja za učenike prvog, drugog i trećeg razreda. Osnovni cilj ove radionice bio je razvoj ekološke svijesti kod mladih. Edukacija i program su sastavni dio velikog ekološkog projekta Let's do it – Očistimo planetu Zemlju za jedan dan.

Prvi kamp za hemičare i biologe

Edukativni kamp za biologe i hemičare održan je 7. i 8. decembra 2018. godine u Gazi-Husrev begovoj medresi u Sarajevu. Kampu za nadarene učenike iz biologije i hemije prisustvovali su učenici iz svih medresa iz Bosne i Hercegovine, kao i učenici Medrese „Mehmed Fatih“ iz Crne Gore i učenici Prve bošnjačke gimnazije iz Sarajeva. U ova dva dana imali su priliku slušati predavanja na temu „Biodiverzitet i vodeni ekosistemi“ koje je održala prof.dr. Sadbera Trožić Borovac, te su posjetili i laboratorije Prirodno-matematičkog fakulteta u Sarajevu, proizvodne pogone firme Milkos i Sinalco, gdje su imali priliku da se upoznaju s procesom proizvodnje i plasmanom proizvoda na tržište. Na ovim susretima našu školu su predstavljali : Aščić Maid, Fazlović Elmedina, Avdić Dženita i Garić Hatidža u pratnji profesora biologije Brigić Edina i Buljubašić Alme, profesorice hemije. Kamp je organizovala Uprava za obrazovanje i nauku Rijaseta Islamske zajednice u Bosni i Hercegovini.

Lejli Begunić proučena hafiska dova

Hafiska dova Lejli Begunić, učenici četvrtog razreda Behram-begove medrese, proučena je u četvrtak, 27. decembra 2018. godine, u Džamiji Medrese. Ona je 60. hafiz među učenicima naše škole u periodu od 2000. godine do danas. Hafiza Begunić položila je hifz 15. decembra 2018. godine pred Komisijom za polaganje hifza

Islamske zajednice u Bosni i Hercegovini. Muhafiz Lejli Begunić je Edin Dedić, profesor u Behram-begovoj medresi, kojem je ovo osmi kandidat kojeg je izveo u zvanje hafiza Časnog Kur`ana. Muftija tuzlanski Vahid-ef. Fazlović je u svome obraćanju čestitao hafizi Begunić, njenim roditeljima, muhafizu. Naglasio je da jedino učenjem Kur`ana i ukoliko živimo po njemu možemo biti snažni. Prisutnima su se obratili i direktor Behram-begove medrese Ahmed-ef. Hatunić. On je rekao da su ovo najdragocjeniji trenuci u našoj školi: Brojimo hafize ne da se hvalimo, nego da ohrabrimo naš narod da uči i memoriše Časni Kuran.

Hafiza Lejla Begunić rođena je u Tuzli 1999. godine. Kćerka je Jasmina i Mirsade. Osnovnu školu završila je u Srebreniku. Hifz je počela učiti u novembru 2017. godine. Hafiskoj dovi su prisustvovali izaslanik Reisu-l-uleme Islamske zajednice u Bosni i Hercegovini hafiz Dževad Šošić, Ibrahim Begović, direktor Uprave za obrazovanje Rijasetu Islamske zajednice u Bosni i Hercegovini, Džemal Muslihu, predstavnik Svjetske organizacije za hifz i Sead Seljubac, pomoćnik muftije tuzlanskog.

Prvaci u vrednovanju srednjih škola Tuzlanskog kantona

Pedagoški zavod Tuzlanskog kantona je na svojoj zvaničnoj web-stranici (pztz.ba), u kategoriji Srednje obrazovanje, potkategoriji Vrednovanja škola, objavio rezultate vrednovanja srednjih škola na području Tuzlanskog kantona za školsku 2017/2018. godinu. U rangu svih srednjih škola, Behram-begova medresa u Tuzli je zauzela prvo mjesto, s ukupno ostvarenih 6.325 bodova. Na drugom mjestu, s osvojenih 4.284 bodova, nalazi se Gimnazija „Meša Selimović“, a trećeplasirana je Richmond park international secondary school Tuzla, s osvojenih 4.114 bodova. Vrednovanje svih srednjih škola na području Tuzlanskog kantona vršili su zaposlenici Pedagoškog zavoda Tuzlanskog kantona, a po Instrumentariju Zavoda.

Zimski seminar za profesore

U Behram-begovoj medresi je 3. 1. ove godine održan zimski seminar za profesore ove škole. Uvodničari su bili eminentni stručnjaci u svojim oblastima iz Tuzle i iz Sarajeva. Iz Pedagoškog zavoda Tuzlanskog kantona predavač je bio Izet Numanović, koji je

održao predavanje na temu Podučavanju kao proces. Na temu Sa- stojci hrane i njihov uticaj na zdravlje govorio je dr. Midhat Jašić s Tehnološkog fakulteta Univerziteta u Tuzli. O Spoznaji, duhovnoj vrlini i moralnoj krijeposti - tri krunske vrijednosti islama govorio je dr. Rešid Hafizović s Fakulteta islamskih nauka iz Sarajeva. O aktuelnoj temi Kako mladima govoriti o religiji zanimljivo predavanje održao je dr. Adnan Silajdžić s Fakulteta islamskih nauka iz Sarajeva. Bila je ovo prilika da se svojim diskusijama i profesori uključe u razgovore o ovim važnim temama.

Održan seminar o mentalnom zdravlju

Udruženje građana Društvo pedagoga i psihologa Tuzlanskog kantona u Behram-begovoj medresi je u četvrtak, 17. 1. 2019. godine, održalo svoj seminar o mentalnom zdravlju. Stručno predavanje je održao dr. Mevludin Hasanović. Tema predavanja je bila Čuvanje mentalnog zdravlja pedagoga, psihologa, odgajatelja u predškolskim i školskim ustanovama. Seminaru su prisustvovali pedagozi iz svih osnovnih i srednjih škola i obdaništa s područja Tuzlanskog kantona, kao i odgajatelji iz Medrese.

Predstavljena knjiga „Odgoj Salahuddinove generacije i povratak u Jerusalem“

O knjizi su govorili Šefko Sulejmanović, Adnan Tufekčić, Rusmir Šadić i hfz. Edin Dedić. Prisutnima su se obratili muftija tuzlanski Vahid-ef. Fazlović i direktor Behram-begove medrese Ahmed-ef. Hatunić. Prevodioci ovog vrijednog djela su hafiz Edin Dedić i Jusuf Džafić, a izdavač je Institut za društvena i religijska istraživanja.

Promovisana knjiga o o Mustafi Busuladžiću

U četvrtak, 14. 2. 2019. godine, u Behram-begovoj medresi je održana promocija knjige “Islam i Zapad u mišljenju Mustafe Busuladžića“, autora Mevludina Dizdarevića. O ovoj ponovo aktualiziranoj temi priliku su imali govoriti prof. dr. Amir Karić i profesor Mustafa Spahić. Prema riječima autora, ova knjiga ima zadatak da predstavi raskošnu, zanimljivu, čak intrigantnu intelektualnu figuru u našoj historiji. Također je istakao i sljedeće: Mustafa Busuladžić zavređuje našu punu pažnju, unatoč stanovitim medijskim

manipulacijama koje su oko njega ispletene. I oni koji ga brane i oni koji ga kude o njemu ne znaju ništa, a to je bio jedan od motiva zašto sam odlučio da napišem ovu knjigu. Organizator promocije bio je Medžlis Islamske zajednice Tuzla, a suorganizatorstva se prihvatila naša škola.

U Gradačcu proučena hafiska dova učeniku Behram-begove medrese

Hafiska dova Zejdu Špijodiću, učeniku trećeg razreda Behram-begove medrese, proučena je u subotu, 16. 2. 2019. godine, u Reuf-begovoj džamiji u Gradačcu. Hafiz Špijodić položio je hifz 21. januara 2019. godine pred Komisijom za polaganje hifza Islamske zajednice u Bosni i Hercegovini. Njegov muhafiz je Mirnes-ef. Spahić, kojem je ovo 32 kandidat kojeg je izveo u zvanje hafiza Časnog Kur'ana. A našoj školi je ovo 62. učenik koji je stekao ovu titulu.

Izaslanik Reisul-uleme Islamske zajednice u Bosni i Hercegovini hafiz Dževad Hrvaić je uručio diplomu hafiza Kur'ana Časnog mladom hafizu. Prisutnima se obratio i direktor Behram-begove medrese Ahmed-ef. Hatunić. Hafiz Zejd Špijodić rođen je 2000. godine u Tuzli. Učenik je trećeg razreda Behram-begove medrese. Pohađao je mekteb u Reuf-begovoj džamiji gdje je počeo učiti hifz pred muallimom hafizom Kemalom Mehićem.

Delegacija Islamske zajednice iz Austrije u posjeti Medresi

Delegacija Islamske zajednice Austrije, koju predvodi predsjednik Umit Vural, 19. 2. 2019. godine posjetila je Behram-begovu medresu. Delegaciju je primio direktor naše škole Ahmed-ef. Hatunić. Predsjednik Vural istakao je zadovoljstvo što novo rukovodstvo Islamske zajednice Austrije ima priliku upoznati se s radom i djelovanjem naše škole. Ova godina je i jubilarna za Islamsku zajednicu Bošnjaka u Austriji. U oktobru se navršava dvadeset pet godina od njenog osnivanja. U proteklim godinama ova zajednica je ostvarila dobre rezultate i ostvarila veliki broj postavljenih ciljeva. U budućnosti će ciljevi biti vezani za medijski nastup, umrežavanje i međusobno povezivanje džemata ove zajednice, realizaciju projekata vezanih za omladinu i uključivanje žena u rad Islamske zajednice.

Akademik Ejup Ganić: Obrazovanje je presudno za opstanak Bosne

U srijedu, 27. 2. 2019. godine, u našoj školi je boravio akademik dr. Ejup Ganić, bivši član Predsjedništva Bosne i Hercegovine i bivši predsjednik Federacije Bosne i Hercegovine, te osnivač i vlasnik jednog od najprestižnijih univerziteta u jugoistočnoj Evropi Sarajevo School of Science and Technology. Akademik Ganić je bio i s profesorima na svečanoj sjednici Nastavničkog vijeća. U svom obraćanju prisjetio se nekih događaja koji su doveli do referenduma za nezavisnost Bosne i Hercegovine u februaru i martu 1992. godine. Podijelio je i svoja sjećanja na rahmetli predsjednika Aliju Izetbegovića, kao i na neke događaje koji su prethodili međunarodnom priznanju Bosne i Hercegovine. Nakon toga, održan je svečani program povodom Dana nezavisnosti. Učenici naše škole su prigodnim recitacijama, izvođenjem drame „Ilhamijin put u smrt“ i učenjem ilahija i sevdalinki obogatili druženje povodom jednog od najznačajnijih dana u historiji naše domovine. Učenicima su se obratili direktor naše škole Ahmed-ef. Hatunić i akademik Ganić. Naš gost je u svom obraćanju podsjetio učenike naše škole na važnost obrazovanja: „Ako budemo učili i radili, promijenit ćemo našu zemlju. Samo uz znanje možemo biti prvi.“

Izvedba drame „Na Božijem putu“ Ahmeda Muradbegovića

Dana 5. marta 2019. godine grupa učenika trećeg razreda pred punom salom je u svojoj školi uspješno izvela dramsku predstavu Na Božijem putu. Riječ je o drami Ahmeda Muradbegovića, koja je dio nastavnog programa Bosanskog jezika u Behram-begovoj medresi. Učenici su nadareno odglumili zahtjevne uloge u drami: Hasana-ga Muminović u ulozi Bega i Amina Badžić u ulozi Lejle, Dženita Mehinbašić u ulozi Hanume, Nasir Nezić kao Čamil-beg Kusturica, zatim Eldar Klapić, Ensar Mehmedović, Melika Smajić i Kanita Ibrahimbegović kao sinovi i snahe, Enida Fatić i Melika Mehmedović kao djevojke u kući i Muhamed Hasanović kao sluga Hasan. S učenicima je radila i pripremala ih njihova profesorica Bosanskog jezika Emina Hatunić. Nakon dugotrajnih priprema i uvježbavanja, ova drama u tri čina je izvedena na oduševljenje publike. Izvedbi drame je prisusutvovao veliki broj učenika i profesora.

Proučena hafiska dova Emini Momković

U četvrtak, 14. 3. 2019. godine, u Behram-begovoj medresi je proučena hafiska dova učenici četvrtog razreda naše škole Emini Momković. Ona je 63. hafiz Behram-begove medrese u periodu od 2000. godine do danas. Njen muhafiz je Abdulah Kapo, profesor u Behram-begovoj medresi, kojem je ona prvi kandidat kojeg je izveo u zvanje hafiza Časnog Kur'ana.

Dovi su prisustvovali i izaslanik Reisul-uleme Senaid Zajimović, direktor Vakufske direkcije, muftija tuzlanski Vahid-ef. Fazlović, direktor Behram-begove medrese Ahmed-ef. Hatunić, predstavnik Svjetske organizacije za hifz Džemal Muslihu, hafizi, imami, porodica i prijatelji mlade hafize. Izaslanik Reisul-uleme Senaid Zaimović uručio je hafizi diplomu Kur'ana Časnog. Hafiza Emina Momković rođena je u Zenici 1999. godine. Kćerka je Smaje i Mensihe. Završila je osnovnu školu u Zavidovićima. Hifz je položila 3. januara 2019. godine pred Komisijom za polaganje hifza Islamske zajednice u Bosni i Hercegovini.

Domovini u čast: završeni Dani porodičnih vrijednosti

Četrnaesta po redu manifestacija Dani porodičnih vrijednosti održana je u petak, 22. 3. 2019. godine, u Bosanskom kulturnom centru u Tuzli. Organizirala ju je Behram-begova medresa, uz podršku Muftijstva tuzlanskog. U prepunoj sali BKC-a učenici Medrese su učili odlomke iz Kur'ana, recitirali hadise, interpretirali ilahije i kaside, čitali recitacije, pjevali sevdalinke, a glumci su izveli kraći dramski prikaz. Posebnost ovogodišnjeg programa je nastup hora Gimnazije „Meša Selimović“, koji se predstavio svojim horskim interpretacijama popularnih melodija. Uz program je održana i izložba kaligrafskih i umjetničkih radova učenika Medrese. Također, objavljeni su i rezultati literarnog konkursa, koji je, u saradnji s Pedagoškim zavodom Tuzlanskog kantona, raspisan za učenike osnovnih i srednjih škola, kao i za učenike Medrese. Prvonagrađenima su uručene nagrade. Danima porodičnih vrijednosti su prisustvovala gošće iz Žepča, Janje, Bijeljine, Odžaka, Modriče, Vlasenice i brojnih drugih mjesta iz Bosne i Hercegovine. Program su pratili i održali svoje besjede Seid Eminović iz Uprave za obrazovanje i nauku Rijasetu Islamske zajednice u Bosni i Hercegovini, muftija

tuzlanski Vahid-ef. Fazlović i direktor Medrese Ahmed-ef. Hatunić. Također su prisustvovali i glavni tuzlanski imam Ahmed-ef. Huskanović, direktorica obdaništa Aladin Dženana Ćudić, direktori ustanova IZ-e u Tuzli i brojni drugi gosti.

Maturanti prošetali svojim gradom

U četvrtak, 18. aprila 2019. godine, maturanti 343. generacije naše škole tradicionalno su prošetali kroz Tuzlu. U pratnji svojih profesora i profesorica, roditelja i mnogobrojnih prijatelja, maturanti su svoju šetnju počeli ispred Medrese, prošetali su do platoa Kapije gdje su proučili Fatihu i položili bijele ruže za ubijenu mladost Tuzle na Kapiji 25. maja 1995. godine, koju su granatom usmrtili vojnici srpske vojske. Zatim su se uputili do Džindić-džamije i porte stare Medrese. Ova generacija je brojna i završava je ukupno 142 učenika. Razrednici su bili hfz. Amir Hodžić, Fadil Alić, Alma Buljubašić i hfz. Edin Dedić. Odgajatelji su bili hfz. Nedžad Vehabović, Merzija Kasumović, Amena Jusufović i Amina Mujić. Ovo je jedna u nizu od aktivnosti kojom maturanti obilježavaju završetak svog školovanja, a završava se svečanom akademijom održanom u subotu, 20. aprila 2019. godine, s početkom u 16 sati.

Svečanom akademijom ispraćeni maturanti 343. generacije

Svečanom maturskom akademijom koja je održana u subotu, 20. aprila 2019. godine, školovanje u Behram-begovoj medresi završila je 343. generacija maturanata. Ovu generaciju maturanata u muškim odjeljenjima vodili su razrednici hfz. Amir Hodžić i profesor Fadil Alić, te odgajatelj Nedžad Vehabović. Maturantice su vodili razrednici profesorica Alma Buljubašić, hafiz Edin Dedić, te odgajateljica Amina Mujić. Svečani dio programa su izveli učenici i učenice naše škole. Gostima i roditeljima su se obratili izaslanik reisul-uleme muftija tuzlanski Vahid-ef. Fazlović, direktor Behram-begove medrese Ahmed-ef. Hatunić i pomoćnik ministra za obrazovanje i nauku Tuzlanskog kantona Fikret Vrtačić. Direktor Hatunić je, između ostalog, rekao: "Još jedna generacija ove škole izlazi iz školskih klupa i obaveza, krećući se prema životnim putevima koji su duži, širi i kompleksniji od bilo kakvog obrazovanja i naučnih teorija koje se izučavaju. Nadamo se da su postigli dovoljno moralnih

i ljudskih vrlina, znanja i radnih navika da budu dostojni reprezentivi svoje škole, naroda i domovine ondje gdje se budu nalazili i djelovali". Ova generacija broji 69 učenika i 73 učenice, a među njima su i dva hafiza i četiri hafize.

Konferencija o razvijanju poduzetničkih vještina

Behram-begova medresa bila je domaćin Konferencije o razvijanju poduzetničkih vještina kod srednjoškolaca, koja je održana 27. aprila 2019. godine. Konferencija je rezultat našeg višegodišnjeg učešća u projektu Budući svjetski poduzetnici (Future Entrepreneurs of the World). Trenutno se on provodi u devet škola u Bosni i Hercegovini (Višegrad, Goražde, Odžak, Velika Kladuša, Prozor, Breza, Maglaj, Gradačac i Tuzla), kao vannastavna aktivnost ili sekcija. Inicijativa je potekla od fondacije Forerunner Federation iz Sjedinjenih Američkih Država, koja pomaže obrazovanje i razvoj talenata u svijetu. Ova inicijativa važan je dio podrške Fondacije razvoju malih nacija i obrazovanju manjina u cijelom svijetu. Specijalni gost na konferenciji je bio osnivač i predsjednik Fodancije Predvodnik prof. E. Andrew Balas.

Cilj programa je da inspiriše učenike i podstakne ih na inovativno poduzetništvo, da im ponudi priliku da uče o vještinama lideršipa, da razvije kod njih fundamentalne etičke poslovne vještine, da stimulira razvoj lokalne ekonomije, te spoji uspješne tradicije s prosperitetnom budućnošću.

Radom u sekciji poduzetništva, učenici stječu liderske i poduzetničke vještine, uspostavljaju saradnju s lokalnim poduzetnicima, uče o osnivanju biznisa, marketingu i izradi budžeta i biznis plana, te učestvuju u volonterskim i društveno korisnim projektima.

Prigodni paketići šticeenicima "Sela mira" u Lukavcu

Predstavnici Vijeća učenika i profesori Medrese su 29. aprila 2019. godine posjetili djecu bez roditeljskog staranja koja borave u ustanovi Selo mira u Lukavcu. Profesori i učenici Medrese su sa predstavnicima ovog doma razgovarali o uslovima u kojima djeca borave, načinima rada i djelovanja ove ustanove, te izrazili želju da se ova saradnja nastavi. Ovom prilikom uručeni su prigodni predramazanski

paketići štíćenícima ove ustanove. Ovu posjetu je iniciralo Vijeće učénika naše škole, a povodom nastupanja ramazana.

Proučena hafiska dovu hafizu Asmiru Imamoviću

Hafiska dova profesorú Asmiru Imamoviću proučena je u utorak, 11. 6. 2019. godine, u Džamiji Medrese. On je hifz položio 22. aprila 2019. godine pred Komisijom za polaganje hifza Rijasetá islamske zajednice u Bosni i Hercegovini. Muhafiz mu je hafiz Amir Hodžić, profesor u Behram-begovoj medresi, kojem je on prvi hafiz učeník. Prisutnima su se obratili direktor Behram-begove medrese Ahmed-ef. Hatunić, muftija tuzlanski Vahid-ef. Fazlović i muftija zenički Mevludin-ef. Dizdarević. Diplomú i priznanje hafiza Kur'ana časnog je uručio muftija Dizdarević. Među gostima su bili i muftija mostarski Salem-ef. Dedović, pomoćnik tuzlanskog muftije Sead Seljubac, te brojni imami, profesori, rodbina i prijatelji. Hafiz Asmir Imamović rođen je 25. oktobra 1976. godine u Vukovijama Donjim, općina Kalesija. Sin je oca r. Fadila i majke Naile. Osnovnu školu završio je u rodnim Vukovijama, a Gazi Husrev-begovu medresu u Sarajevu 1996. godine. Godine 2000. diplomirao je na Fakultetu za šerijatsko pravo Univerziteta Al-Azhar. Radio je kao vjeroučitelj u Osnovnoj školi „Tušanj“, a kasnije kao imam, hatib i mualim u džematu Gračanica Selo. Od 2005. do 2013. godine radi kao profesor/odgajatelj u Behram-begovoj medresi, a od 2013. godine kao profesor akaida. Aktivno govori arapski i engleski jezik. S arapskog jezika preveo je nekoliko djela. Kao učeník Gazi Husrev-begove medrese počeo je učiti hifz pred hafizom r. Mahmudom Traljčićem.

Studijsko putovanje učénika medresa iz Bosne i Hercegovine

U okviru studijskog projekta Moje mjesto u Evropi, koje je organizirala Evropska unija u Bosni i Hercegovini, učeníci naše medrese dobili su priliku da predstave svoje radove u Briselu, te da posjete još neke gradove značajne gradove u Evropi. Studijsko putovanje je trajalo od 29. 6. do 5. 7. 2019. godine, a naši učeníci su na ovom izuzetnom putovanju posjetili Pečuh u Mađarskoj, Frankfurt u Njemačkoj, Wels u Austriji, Brisel u Belgiji, Heidelberg, studentski grad u Njemačkoj, Minhen i Zagreb. Tokom ove posjete imali su

priliku da obidu historijske znamenitosti ovih gradova. Centralna manifestacija održana je 2. jula u centru Evropske unije u Briselu, gdje je upriličena izložba izabranih učeničkih radova u okviru projekta Moje mjesto u EU; izgradnja i promocija dijaloga o EU integraciji. Izložbu su činile fotografije, umjetnički radovi i eseji, koji su proglašeni najboljim na javnom konkursu u okviru ovog projekta.

Ukupno dvadeset učenika i učenica iz šest bosanskohercegovačkih medresa su predstavili našu zemlju u srcu Evropske unije. Izložbi su prisustvovali predstavnici i uposlenici EU institucija, među kojima su bili Merete Bilde iz Odjela za strategiju i planiranje EEAS, te Clive Rumbold, zamjenik šefa odjeljenja za Zapadni Balkan u Evropskoj službi za vanjske poslove. On se obratio prisutnima i izrazio oduševljenje onim što je vidio na izložbi. Tu su još bili Jasna Jelisić, šefica grupe za Zapadni Balkan i divizije za strateške komunikacije pri EEAS-u, Melika Arifhodžić, projekt menadžer, Medina Mehmedović-Mulalić i Samra Radovović-Smajić, koordinatorice projekta, Amila Ibričević, politički savjetnik specijalnog predstavnika EU u Bosni i Hercegovini, direktor Uprave za vanjske poslove i dijasporu Rijaseta IZ-e u BiH Razim Čolić, savjetnik Reisul-uleme za medije Muhamed Jusić, šef Odjela za srednjoškolsko obrazovanje Rijaseta Seid Eminović i dr.

Izuzetni ambasadori naše zemlje i naše škole na ovoj izložbi bili su učenici Mirzet Muškić, Harun Bečić, Fadil Umihanić, Selma Džafić i Anesa Spahić. Sve vrijeme s njima je radio i pripremao ih za ovaj zahtjevan projekat Ahmed Omerović, profesor Demokratije i ljudskih prava u Behram-begovoj medresi.